

Yèsse Djîle

**Yèsse Djîle, c'est fôurt maléjîle a spliquî
c'est 'ne saquè qu' on r'sint in li minme
què pou comprinde, i fôt l' viki
c'est come ène bèle coumére qu' on-inme.**

**Yèsse Djîle, c'est vîr s' alumér su s' visâdje
quand on din pâle a l' ocâsion
in solèy' vûdant dès nuwâdjès
qui fêt r'montér s' vwas d' in ton.**

**Yèsse Djîle, c'est din tat'lér tout l' long d' l' anéye
come souv'ni ou bîⁿ bon a v'ni
in buvant s' pinte après s' djournéye
ou bîⁿ in vacances lon dè d' ci.**

**Yèsse Djîle, c'est co fé s' pas a tous lès fièsses
mariâdje, ducace ou rabind'lâdje
c'est dj'wér du tamboûr dèssu 'ne drèsse
'yèt fé mète tout l' monde a dalâdje.**

**Yèsse Djîle, c'è-st-in mwas avant lès soumonces
aprèstér chabots 'yèt sôro
dèv'ni co pus souyant qu' ène ronce
conte tous lès môs s' sougnîⁿ d' asto.**

**Yèsse Djîle, c'est fèrtèyî pindant dès s'mènes
saquantès nût's sans pus dormi
in parlér tous lès djoûs a scrène
quand i sint l' carnèval vèni.**

**Yèsse Djîle, c'est yèsse eûreûs quand tout l' famîye
è-st-alintoûr pou l' abiyî
nèrveûs in ratindant l' bat'rîye
nîⁿ d'morér 'ne sègonde sans boudjî.**

**Yèsse Djîle, c'è-st-intinde arivér l' tamboûr
lès larmes as-îs d' s' èrvîr inchène
èl clarinète qui djûwe a s' toûr
èl preumière coupe pou prinde alène.**

Yèsse Djîle, c'est fé s' preumîⁿ pas su l' kèmin

**comprinde què c'è-st-in bia moumint
l' rabind'lâdje du dîmince matin
'yèt l' bat'rîye qui mèt l' binde in trin.**

**Yèsse Djîle, c'èst s' amûsér pindant twâs djoûs
avoû du plési pou dès rî^{ns}
c'èst l' prôte qu' on conte in buvant in côup
yun l' ôte ès' fé inmarvoyî.**

**Yèsse Djîle, c'èst brûlér lès bosses èl mardi
brére èyèt rîre come dès-èfants
fé r'passâdje duqu' ô mèrcrédi
èn' pus minme savou qu' on-èst scrand.**

**Yèsse Djîle, c'èst s' quitér in s' promètant bîⁿ
minme si on n' s' èrvwat pus avant
dè s' èrtrouvér l' anéye qui vî^{nt}
èyèt qu' ça seûsse linsi tous l's-ans.**

**Yèsse Djîle, c'è-st-ô pus râde mète al cagnote
pou s' sinte pus seûr d' èrcouminchî
il-a toudis s' keûr qui clicote
a l' idéye què ça s'roût l' dèrnîⁿ.**

**Yèsse Djîle, c'èst lès-amitiès qu' on s' a fêt
'yèt lès bias souv'nis qu' i din d'meûre
radjon.ni rîⁿ qu' a i pinsér
savou çou qu' ça done dè boneûr.**

**Yèsse Djîle, c'èst tout ça èyèt 'ne masse d' afêres
i fôt l' vikî pou l' comprinde
avant tout c'èst yèsse bon compère
èyèt fé partîye d' ène bone binde.**

Robert HEIREMANS (+) LA LOUVIERE

Dépôt légal SABAM

Avec l'autorisation de madame Olga Van Cleemput, veuve de Robert Heiremans et de Christian Quinet, son beau-fils.